

DOMINGU VI PÁSKUA – TINAN A

Tema

Liturjia Domingu daneen Páskua nian konvida ita atu deskobre Maromak nia prezensa hakmatek maibé efikás iha Kreda nia dalan iha istória. Jezús nia promesa – “ha’u sei la husik imi oan-kiak” – bele sai sínteze di’ak tema ohin nian.

Evanjellu apresenta mai ita parte ida Jezús nia “testamentu”, iha han-kalan despedida nian. Ba dixípulu sira ne’ebé la hakmatek, Jezús promete “Paráklitu”: Nia sei lori comunidade sarani ba diresaun lialoos nian; no lori ba komuñauñ íntima ba beibeik ho Jezús no ho Aman Maromak. Nune’e, comunidade sei sai “Maromak nia horik-fatin” iha mundu no fó sasin salvasaun ne’ebé Nia hakarak oferese ba ema sira.

Leitura dahuluk hatudu comunidade fó sasin Liafoun Di’ak no sai prezensa libertadora no salvadora iha ema sira nia moris. Espíritu sei hatudu an no atua bainhira comunidade aseita moris nia fiar integra an iha família universál maun-alin sira nian, hale’u Aman no Jezús.

Leitura daruak husu sarani sira – iha mundu nia rai-kunan nia oin – atu iha konfiansa, atu fó sasin fiar nian iha hakmatek, atu hatudu domin ba ema hotu, ba funu-balu sira mós. Kristu ne’ebé halo nia moris don ida domin nian ba ema Kristu, tenke sai modelu ne’ebé sarani sira tenke tuir.

LEITURA I – Apóst 8,5-8.14-17

Bainhira kristianizmu hahú iha tinan dahuluk sira, nia la sai husi Jerusalém: kapitulu 7 livru Apóstolu sira nia Hahalok apresenta Kreda Jerusalém nian no sasin sarani sira-nian iha sidade ne’e.

Iha tinan 35 nune’e, hahú persegisaun kontra membru sira comunidade sarani Jerusalém nian. Persegisaun ne’e liuliu ba sarani sira mai husi judeu-elenista sírkulu Estêvão nian, tanba sira lakohi mantein fidelidade ba Lei Moisés nian. Nune’e sarani sira-ne’e husik Jerusalém no la’o namkari iha rejiaun seluk Palestina nian. Ne’e mak providénsia Maromak nain, obra Espíritu nian, ne’ebé halo atu Evanjellu bele habelar iha rejiaun seluk.

Leitura dahuluk domingu ne’e nian ko’alia mai ita kona-ba Filipe – sira ida husi diákonu na’in 7, grupu hanesan ho mártir Estêvão (kf. Act 6,1-7) – ne’ebé, sai husi Jerusalém atu ba haklaken Evanjellu ba makhorik sira rejiaun sentrál Palestina nian, katak Samaria.

Samaria ba ema judeu sira mak rai jentiu sira-nian. Ema judeu sira despreza samaritanu sira tanba sira ema judeu maibé raan kahur ho ema jentiu sira no la moris pureza fiar jahwista.

Anúnsiu Evanjellu nian ba samaritanu sira hatudu katak Kreda la iha fronteira no nakloke ba mundu jentiu.

MENSAJEN

Ita-nia testu fahe ba parte rua.

Iha parte dahuluk (vers. 5-8), ita iha sumáriu ida ne’ebé rezume Filipe nia atividade misionária iha samaritanu sira leet. Filipe haklaken “Mesias” – katak, apresenta Jezús Kristu no ninia proposta makso’in. Samaritanu sira adere tomak ba Filipe nia liafuan sira, no moris mai comunidade “Reinu” nian, ema foun no livre. Realidade ne’e hamosu ksolok kle’an: ksolok mak marka ida iha Lucas nia obra; ksolok akompañia comunidade “Mesias” nian.

Iha parte daruak (vers. 14-17), Lucas refere kona-ba Pedro no João ne'ebé to'o iha Samaria. Bainhira comunidade sarani Jerusalém nian rona katak Samaria simu Jezús nia lia-tatoli, sira haruka Pedro no João atu halo visita inspesaun nian. Lucas la haktuir Pedro no João nia reasaun bainhira haree Evanjellu habelar; nia fó sai dei't katak maski samaritanu sira simu ona batizmu, sira seidauk simu Espíritu Santu. Sá loos ninia signifíkadu? Provavelmente, signifíka katak samaritanu sira nia adezaun ba Evanjellu superfiiál de'it (karik motivasaun atu sai sarani tanba haree Filipe halo kmanek oioin, duké mai husi konviksaun kl'ean) no katak, sira seidauk iha konxiénsia loos pertense ba família boot Jezús nian, katak Kreda universál. Pedro no João tau liman ba samaritanu sira, atu sira mós simu Espíritu. Espíritu, iha ne'e, mak marka ne'ebé fó prova katak samaritanu sira hola parte ba Kreda universál no iha komuñauñ ho Kreda Jezús Kristu nian.

Mensajen mak tuirmai ne'e: atu comunidade ida sai Kreda, la to'o aseitasaun superfisiál Liafuan nian, la to'o mós manifestasaun umana (maski ho kbiit oinsá). Komunitade presiza iha konxiénsia katak nia la'ós sélula autónoma ida, maibé simu konvite atu moris nia fiar hodi integra an iha Kreda universál, iha komuñauñ ho Kreda universál. Komunitade ne'ebé hakarak halo parte Jezús nia família tenke, simu autoridade no buka rekoñesimentu husi bibi-atan Kreda universál nian. Nune'e de'it mak Espíritu, katak Maromka nia moris sei hatudu an iha nia.

LEITURA II – 1 Pedro 3,15-18

Surat dahuluk Pedro nian akompañia tiha ona ita durante tempu hirak ne'e. Nune'e ita hatene ona katak autór nia objetivu mak ezorta eh husu sarani sira atu moris iha fidelidade ba kompromisu ne'ebé asume ona ho Kristu, iha loron Batizmu. Atu halo nune'e, autór fó hanoin ba sira kona-ba Kristu nia ezemplu, ne'ebé mate iha krús molok to'o iha moris-hi'as.

MENSAJEN

Ita-nia testu hatudu sá loos mak tenke sai sarani sira nia atitude, hasoru mundu nia laran-hirus, mundu nia rai-kunan, provokasaun no injustisa sira.

Uluknanai, sarani sira tenke rekoñese iha sira nia fuan Kristu nia “santidade”, katak “Na’i” (“Kyrios” – Maromak rasik, mak Na’i mundu no istória nian) Husi rekoñesimentu santidade no soberania absoluta Kristu nian, mai konfiansa no esperansa; nune'e sarani sira la ta'uk no iha kbiit atu enfrenta injustisa no persegisaun (vers. 15a).

Sarani sira mós tenke, nafatin dispostu atu apresenta razaun ba sira-nia fiar no esperansa – katak, só sasin kona-ba buat ne'ebé sira fiar (vers. 15b). Maski nune'e, sira halo laho' agresividade, maibé ho delikadeza, ho modéstia, ho respeito, ho konxiénsia di'ak, hodi hatudu sira-nia domin ba hotu, maski sira-ne'e mak funu-baluk. Hodi halo nune'e sira dezarma funu-balu sira no laiha argumentu atu hasoru sira; no sira sei hatene lalais lialoos no justisa horik iha sorin ida-ne'ebé (vers. 16). Iha momentu hotu, di'ak eh aat, sarani sira buka de'it halo di'ak (vers. 17).

Autór surat nian remata ninia ezortasaun, hodi apresenta ba sarani sira razaun fundamentál atu ba sira nia komportamentu ne'ebé “la tuir lójika”: “Kristu mate dala ida ba nafatin ba ita-nia salan hotu – ema justu ba ema injustu sira – atu lori ita ba Maromak” (vers. 18a). Se Kristu haraik salvasaun ba ema injustu sira mós, sarani sira mós tenke haraik moris no halo di'ak, maski ema persege no haterus sira.

Dalan saran moris nian la'ós dalan frakasu no mate nian: Kristu, ne'ebé mate ba ema aat sira, hetan fali moris hodi Espíritu nia kbiit; tanba ne'e, sarani sira ne'ebé halo sira nia moris don ida – hanesna Kristu – sira mós sei moris hi'as.

EVANJELLU – João 14,15-21

Ita kontinua iha kontestu hanesan Evanjellu domingu kotuk nian. Autoridade judaika sira hakotu lia ona atu oho Jezús no Nia rasik hatene kona-ba ne'e.

Iha han-kalan ikus, molok mate iha krús, Jezús halibur ninia dixípulu sira iha meza. Durante “han-kalan”, Jezús despede ho dixípulu sira no hato'o rekomendasaun ikus. Jezús nia liafuan sira sai “testamentu finál”; Nia hatene katak Nia atú bá Aman no dixípulu sira kontinua iha mundu. Jezús ko'alia ba sira kona-ba dalan ne'ebé Nia halo ona (no tenke halo to'o remata misaun ne'ebé Aman entrega ba Nia molok fila fa Aman); no Nia konvida dixípulu sira atu halo tuir dalan ne'ebé Nia halo, dalan saran an nian ba Maromak no domin radikál ba maluk sira. Hodi tuir “dalan” ida-ne'e mak sira sei sai Ema Foun no sai “Maromak nia família” (kf. Jo 14,1-12).

Dixípulu sira preokupa no la hakmatek. Sira bele eh lae tuir “dalan” ne'e se Jezús la la'o iha sira-nia sorin? Oinsá mak sira sei mantein komuñau ho Jezús no oinsá sira simu kbiit husi Nia atu saran, lora ba lora, sira-nia moris rasik?

MENSAJEN

Jezús garante ba dixípulu sira katak Nia sei la husik sira mesak iha mundu. Nia bá Aman; maibé nia sei kontinua horik ho sira no akompaña dixípulu sira nia dalan.

Dixípulu sira prezisa kontinua tuir Jezús, manifesta sira-nia adezaun ba Nia, hadomi Nia. Konsekuénsia domin ne'e nian mak kumpre ukun-fuan ne'ebé Jezús husik hela. Iha kazu ne'e, ukun-fuan la'ós ona norma esterna ne'ebé tenke kumpre, maibé sai espresaun momoos dixípulu sira nia domin no sintonia ho Jezús (vers. 15).

Jezús sei hamutuk ho dixípulu sira hodi haruka “Paráklitu” (vers. 16). Liafuan gregu “paráklêtos”, ne'ebé João uza, pertense ba vokabuláriu jurídiku no hakarak dehan, iha kontestu ne'e, liafuan ne'e signifika tulun eh defende ema ne'ebé hetan akuza husi funu-balu. Ita bele tradús ba “advogadu”, “tulun-na'in”, “defensór”. Nune'e, liafuan ne'e iha sentifu “konsoladór” no “intersesór” nian. Iha Testamentu Foun, liafuan ne'e mosu de'it iha João, aplika ba Espíritu (kf. Jo 14,26; 15,26; 16,7), no aplika mós ba Jezús rasik (ne'ebé iha lalehan, kumpre misaun intersesaun nian) – kf. 1 Jo 2,1).

“Paráklitu” ne'ebé Jezús sei haruka mak Espíritu Santu – apresenta iha-ne'e nu'udar “Espíritu Verdade nian” (vers. 17). Enkuantu nia horik ho dixípulu sira, Jezús hanorin sira, proteje sira, defende sira; maibé, hori ohin ba oin, Espíritu mak sei hanorin no tau matan ba Jezús nia comunidade. Espíritu sei hala'o papél rua: ida, sei halo dixípulu sira konserva memória Jezús nian, ninia hanorin sira mós, tulun sira interpreta Jezús nia hanorin iha dezafiun foun nia roman; rua, Espíritu sei fó seguransa ba dixípulu sira, gia sira, defende sira bainhira hasoru opozisaun no mundu nia rai-kunan. Iha kazu hotu, Espíritu sei lori comunidade tuir dalan istória nian, hodi bá hasoru lialoos, liberdade nakonu, vida definitiva.

Depoizde garante ba dixípulu sira katak Nia sei haruka “Paráklitu”, Jezús afirma dala ida tan katak nia sei la husik sira “oan-kiak” iha mundu. Liafuan ne'ebé uza (“oan-kiak/órfaun”) signifikativu liu: iha Testamentu Tuan “oan-kaik” mak protótipu ema ne'ebé la iha folin, laiha kbiit, depende totalmente ba ema kbiit-na'in sira no sai vítima ba injustisa hotu. Jezús klaru liu: nia dixípulu sira sei hetan defeza, basá Nia sei hela iha sira nia sorin.

Jezús sei husik mundu, Nia sei bá Aman. “Mundu” sei la haree tan ona Nia, basá Nia sei la presente ho ninia isin fíziku. Maski nune'e dixípulu sira bele “haree Nia” (“kontempla Nia”): sira kontinua iha komuñau moris nian ho Jezús no sei simu Espíritu ne'ebé haraik ba sira Jezús moris-hi'as nia moris (vers. 18-19).

Iha lora ne'ebé Jezús sa'e bá Aman no dixípulu sira simu Espíritu, comunidade sei deskobre – hodi Espíritu nia kbiit – katak sira halo parte Maromak nia família (vers. 20-21). Jezús identifika An ho Aman, tanba iha Espíritu ida de'it; dixípulu sira identifika an ho Jezús, hodi

Espíritu nia kbiit. Komunidade sarani sai ida ho Aman, liuhusi Jezús, iha esperiéncia unidade no komuñauun moris nian entre Maromak no ema. Iha loron ne'e, comunidade sei sai Maromak nia horik-fatin: nia no membru ida-idak nakfilak an ba Maromak nia uma, espasu iha-ne'ebé Maromak bá hasoru ema sira. Iha comunidade dixípulu sira-nian no liuhusi nia, Maromak realiza asaun salvaun nian iha mundu.